

मार्निंग डोगरी न्यूज बुलेटिन, समे. 09.20 Hrs

<><><><><><>

Headlines

- भारतीय अंतरिक्ष अनुसंधान संगठन इसरो नै कल रातीं स्पेडेक्स मिशन दा कामयाब प्रक्षेपण कीता।
- उपराज्यपाल मनोज सिन्हा होरें जम्मू यूनिवर्सिटी दी 88 यूनिवर्सिटी काउंसल मीटिंग दी अध्यक्षता कीती।
- उपमुख्यमंत्री होरें खनन मैहकमे दे कम्मकाज दा जायजा लैता ते खनन दौरान नियम कायदे दी पालमा लेई जोर पाया।
- केंद्री गृह सचिव होरें जम्मू-कश्मीर दी सुरक्षा स्थिति दा जायजा लैता।
- मौसम विभाग ने अज्जै लेई मौसम दे खुशक रौहने ते किश थाहरें सीत लैहर जारी रौहने दी पेशगाई कीती। जम्मू-श्रीनगर राष्ट्रीय जरनैली शिड़क गड्डिएं दी आओजाई लेई खुल्ली दी ऐ जिसले कि मुगल शिड़क अजें बी बंद।

<><><><><><>

ISRO

भारतीय अंतरिक्ष अनुसंधान संगठन इसरो नै जंदी रातीं स्पेडेक्स मिशन दी कामयाब अजमैश कीती। श्री हरिकोटा सतीश धवन अंतरिक्ष केंद्र थमां इसरो दे PSLVC-60 राकेट गी द'ऊं अंतरिक्ष यानें कन्नै गासै च छोड़ेआ गेआ।

एहदे नै अंतरिक्ष च डॉकिंग यानि वमान दे स्थापित करने ते हटाने दे कम्मं च मदद होग। PSLVC-60 राकेट नै SDX-1 ते SDX-2 नां दे द'ऊं उपग्रहें गी धरतीदी नीमी कक्षा च कामयाबी कन्नै स्थापित करी दिता। SDX01 गी चेंजर ते SDX-2 गी टार्गेट नां दिता गेदा ऐ। एह दवें उपग्रह अगले 10एं दिनें च अंतरिक्ष च डॉकिंग दा उद्देश्य पूरा करने लेई अगड़े बधाए जांगन। स्पेडेक्स मिशन दा मकसद अंतरिक्ष च डॉकिंग छमता गी उन्नत तकनीक दा प्रदर्शन करना ऐ जेड़ी भारत दे “मून मिशन” ते भारतीय अंतरिक्ष स्टेशन जनेए भविक्ख दे कार्यक्रमें लेई अत्त जरूरी ऐ। एहदे कन्नै गै भारत स्पेस डाकिंग दी छमता आहला दुनिया दा चौथा मुख्य बनी गेआ ऐ। एहदे शा पैहले अमरीका, रूस ते चीन कश गै एह छमता ही। सफल प्रक्षेपण दे बाद इसरो दे चेयरमैन एस. सोमनाथ होरें दस्सेआ जे दौनें उपग्रहें दे पैनल कामयाबी कन्नै तैनात करी दिते गेन ते अगले किश दिनें च दवै उपग्रह 20 किलोमीटर दा सफर तैह करियै ते परति मिलंगन ते फही डाकिंग प्रक्रिया शुरू होग।

<><><><><><>

LG-JU Council

उपराज्यपाल मनोज सिन्हा होरें कल राजभवन जम्मू च जम्मू विश्वविद्यालय दी यूनिवर्सिटी काउंस दी 88मीं बैठक दी अध्यक्षता कीती। यूनिवर्सिटी काउंसल नै विश्वविद्यालय दे समूलचे कम्मकाज च होर सुधार करने लेई शैक्षिक ते प्रशासनिक महत्व दे बक्ख-बक्ख मामलें पर विचार-विमर्श कीता। बैठक च यू.जी.सी ते राष्ट्रीय शिक्षा नीति 2020 दे दिशा-निर्देशों ते अधिसूचनाएं मताबक कई प्रावधानें गी अपनाने ते शामिल करने सने बक्ख-बक्ख एजेंडें ते प्रस्तावें गी सिद्धांतिक तौरा पर मंजूरी दिती गई।

उपराज्यपाल होरें यूनिवर्सिटी गी निर्देश दिता जे ओह अमले गी मजबूत करने, खाली पेदी असामियें गी पुर करने ते होरनें मामलें गी हल करने लेई महत्वपूर्ण गेंह पुट्टन। इस मौके पर जम्मू-कश्मीर दियां शिक्षा मंत्री सकीना इतू, उच्च शिक्षा मैहकमे दे अतिरिक्त मुख सचिव, उपराज्याल हुंदे प्रधान सचिव ते जम्मू यूनिवर्सिटी दे वाइस चांसलर प्रो. उमेश राय सने होरनें मुतल्लका अधिकारियें बी हिस्सा लैता।

<><><><><><>

Dy.CM

उपमुखमंत्री सुरेंद्र चौधरी होरें अफसरें गी हिदायत कीती जे ओह खनन मौके सारे नियमें-कायदें दी पालमा करन ते इनें गतिविधिएं दौरान पर्यावरण सरबन्धी चिंताएं गी बी ध्यानै च रखन। उपमुखमंत्री होरें एह गल्ल जम्मू दे सिविल सचिवालय च खनन मैहकमे दी लगगी दी बैठक च आक्खी। एहदे च सरबन्धी मैहकमे दे निदेशक ते होर दुए लोक शामिल होए। इस मौके पर सब्बनें गी हिदायत करदे होई सुरेंद्र चौधरी होरें आखेआ जे नियमें दी खिलाफवर्जी गी बर्दाश्त नेई कीता जाग।

<><><><><><>

JK-Bank

जम्मू-कश्मीर बैंक दे प्रबंधक निदेशक ते मुख कार्रकारी अधिकारी दे तौर पर अमिर्तव चटर्जी होरें औहदा साम्भेआ ऐ। चटर्जी होरें बलदेव प्रकाश हुंदे 3 बरें दा कार्यकाल मुक्कने मगरा इस औहदे गी साम्भेआ ऐ। चटर्जी होरें आखेआ जे ओह जम्मू-कश्मीर बैंक दी तरक्की गी जारी रखने ते इसी होर मता बदाने पर ध्यान देंगन।

चटर्जी होंरें इक खबर एजेंसी गी दसेआ जे उंदा चेचा ध्यान जम्मू-कश्मीर बैंक आसेआ पिछले बरे च कीते गेदे नेक कम्में गी जारी रक्खना ते विकास लेई अगगे कम्म करना होग। उनें आखेआ जे बैंक दा मुख ग्राहक आधार जम्मू-कश्मीर ते लद्दाख खेतरें च ऐ, इसी करी खेतर च लोकें गी दिते जाने आहली सेवाएं च सुधार पर मता ध्यान दिता जाग।

<><><><><><>

PSA

उधमपुर जिले दे बसंतगढ़ इलाके थ्वां पुलसै आतंकवादिएं दे इक सहायक गी जन सुरक्षा कनून तैहत हिरासत च लैता ऐ। ओदी पंछान मोहम्मद रफीद वलद मोहम्मद कासिम दे तौर पर होई ऐ। ओह बसंतगढ़ दा रौहने आहला ऐ। पीएसए दे तैहत इलाके च एह 5मीं गिरफ्तारी होई ऐ। अधिकारिएं दा आखना ऐ जे हिरासत च लैता गेदा एह व्यक्ति कई सारी आतंकी गतिविधिएं च शामिल हा ते एह आतंकवादी संगठनें गी उंदी गतिविधियां अंजाम देने च मदद ते सहायता उपलब्ध करोआंदा हा।

<><><><><><>

Baseline Survey Udhampur

उधमपुर दियां डिप्टी कमिशनर सलोनी राय हुंदी अध्यक्षता च मिशन युवा तैहत बेसलाइन सर्वे लेई तैनात सुपरवाइजरें लेई इक दनै दे सिखलाई कार्यक्रम दा आयोजन कीता गेआ। सिखलाई कार्यक्रम डी.सी दफ्तर परिसर दे कांफ्रेंस हाल च लगगा।

इस मौके पर अतिरिक्त जिला विकास कमिशनर ते होरनें मुतल्लका अधिकारी मौजूद हे। डी.सी होरें सुपरवाइजरें ते मुतल्लका मैहकमें गी निर्देश जारी कीते जे पैहली जनवरी 2025 गी होने आहले बेसलाइन सर्वेक्षण दा बवस्थित ढंग्गै सिर संचालन यकीनी बनाया जा। इस मौके पर उधमपुर दियां डिप्टी कमिशनर सलोनी राय होरें आखेआ।

<><><><><><>

Home Secy. Review Meeting

केंद्री गृह सचिव गोविंद मोहन होरें श्रीनगर च विशिष्ठ सुरक्षा अधिकारिएं कन्नै इक बैठक लाइए जम्मू-कश्मीर दी सुरक्षा स्थिति दा जायजा लैता। इस बैठक च सुरक्षा बल, पुलस ते खुफिया विभाग दे उच्च अधिकारी शामिल होए। केंद्र शासित प्रदेश च आतंकवाद रोधी अभियानें बारें चर्चा करने दे अलावा कब्जा रेखा पर कीते गेदे होरनें सुरक्षा सरबन्धी हीलें पर बी चर्चा होई। बैठक च हाल च होई दी बर्फबारी पर बी चर्चा होई कीजे इस दौरान घुसपैठ दियां कोशशां बदी जंदियां न। इस करी घुसपैठ गी रोकने लेई पूरे पराते तंत्र गी सौहगा रौहने दी जरूरता पर बल दिता गेआ। गृह सचिव होरें बक्ख-बक्ख एजेंसिएं बश्कार नेइमें तालमेल पर जोर पाया तां जे जम्मू-कश्मीर दी शांति गी कोई नुकसान नेई पुजाई सकै, खास करी औंदे गणतंत्र दिवस दे सरबन्धे च तैयारियां पूरियां होनियां लोइचदियां।

<><><><><><>

Food Safety Camp Reasi

खाद्य सुरक्षा सरबन्धी भारती खाद्य सुरक्षा ते मानक प्राद्विकरण एफ.एस.एस.ए.आई दे बैनर हेठ ते स्वच्छता सरबन्धी इक जागरूकता कैंप दा सरिस्ता कीता गेआ। इक कैंप दा मकसद खाद्य बपार संचालकें गी रेहड़ी-फड़ी लाने आले ते लोकें गी खाने सरबन्धी स्वच्छता बनाई रखने ते खाद्य सुरक्षा मानकें दी पालमा करने दी महत्व गी उजागर करना हा। इस कैंप दा उद्घाटन जम्मू-कश्मीर दे खाद्य ते दवाइयें सरबन्धी कमिशनर हशमीत अली यत्तू होरें कीता ते खाने-पीने आहली चीजें च स्वच्छता बनाई रखने पर बल दिता। इस मौके पर खाने-पीने आहली चीजें च मिलावट, स्वच्छता बनाई रखने ते होरनें चीजें बारें लोकें गी जानकारी दिती गेई। इस मौके पर खाने-पीने आहली चीजें ते दवाइयें पर तक्क रखने सरबन्धी जेएण्डके कमिशनर फूड एंड ड्रग एडमिनिस्ट्रेटर हशमीत अली यत्तू होरें आखेआ।

<><><><><><>

DC-Poonch

पुंछ दे डिप्टी कमिशनर विकास कुंडल होरें समग्र कृषि विकास कार्यक्रम तैहत जिला टास्क फोर्स कमेटी दी बैठक दी अध्यक्षता कीती।

डिप्टी कमिशनर होरें मेदवारें दा इंटरव्यू लैता ते 27 रेशम दे कीड़े पालने आहली इकाइयें दी स्थापना गी मंजूरी दिती जेदे कन्नै लाभार्थियें गी जरूरी लोन सुविधा उपलब्ध होगं पुंछ च रेशम दे उत्पादन गी शुरू करने लेई डिप्टी कमिशनर होरें दस्तकारी सरबन्धी असिस्टेंट ड्रैक्टर होरें गी निर्देश दिता जे ओह लाभार्थियें लेई सिखलाई सत्रें दा आयोजन करन।

<><><><><><>

Weather

मौसम विभाग ने अज्जै लेई मौसम दे खुशक बने दे रौहने ते किश थाहरें सीत लैहर जारी रौहने दी पेशनगोई कीती ऐ। उआं कल मौसम दे बदलोखड़े रौहने ते कई-कई थाहरें पर हल्की बर्फबारी दी भविक्खवाणी कीती गेई ऐ। मैहकमे नै आखेआ ऐ जे जम्मू दे पददरे इलाकें च 3 थमां 6 जनवरी तगर मौसम दे बदलोखड़े रौहने दे कन्नाकन्नी हल्की थमां दरम्याने दर्जे दी बरखा बरने दे असार न। एहदे अलावा 4 ते 5 जरवरी गी उप्परलियें धारें पर बर्फबारी बी होई सकदी ऐ। मैहकमे नै यात्रियें गी सलाह दिती ऐ जे ओह जिला प्रशासन ते ट्रैफिक अधिकारियें आसेआ जारी मश्वरे दी पालमा करन। उआं जम्मू श्रीनगर राश्ट्रीय जरनैली शिड़कें पर गड़डियें गी दौनें बक्खी आओजाई दी इजाजत ऐ। मुगल रोड अजें बी बंद ऐ। हालांकि शोपियां आहली बक्ख थमां पीर गी गली तगर शिड़क थमां बर्फ गी हटाने दा कम्म पूरा होई गेआ ऐ ते मेद कीती जा रदी ऐ ते तौलें गै मुगल रोड गी ट्रैफिक लेई खोली दिता जाग।

<><><><><><>